

21/11/1997

Tindakan Amerika biadap

Mohd Sharulazilan Said

TINDAKAN Amerika hendak menghantar pasukan menyiasat Petronas adalah satu tindakan biadap dan tidak bertamadun. Tindakan itu seolah-olah hendak mengajar kita apa yang patut dibuat, apa yang boleh dibuat, apa yang tidak boleh dibuat dan semuanya mestilah memuaskan hati mereka.

Dalam persiapan kita untuk menuju Wawasan 2020, kita sudah tidak ada masa untuk melayan karenah mereka. Tindakan Perdana Menteri, Datuk Seri Dr Mahathir Mohamad menyelar negara Utara memang wajar dan tepat pada masanya.

Pusat bagi segala masalah dalam dunia adalah di sana dan mereka sedang cuba mengeksport ke rantau kita. Desakan daripada sesetengah ahli Kongres agar Dr Mahathir meminta maaf atau meletakkan jawatan juga amat lucu dan menunjukkan kedangkalan mereka dalam berfikir.

Melalui ruangan ini saya menggesa rakyat Malaysia bersama mendukung Perdana Menteri dalam menghadapi Amerika. Inilah masanya untuk kita menunjukkan solidariti kepada Dr Mahathir. Jika dulu ketika Amerika memulau minyak sawit kita, kayu balak kita dan banyak lagi produk Malaysia, ramai rakyatnya yang mendukung kerajaan mereka.

Apa kata sekarang kita sama-sama memulau barangan mereka, kita tunjukkan yang mereka memerlukan kita. Kecil jangan disangka anak, besar jangan disangka bapa. Untuk pimpinan negara, berat sama dipikul, ringan sama dijinjing.